

KOTAVUSA VIRDA


KOTAVUSA VIRDA VESTASA VA TAMAVA IS ARAYEEM MU AYIKEEM

Santaneaksat ke 2023

13^e otuk

Kotava, tela tamefa golerava
Va ina kosmac !!





1250 - 1350 !

Blira sareon gu lamone



Blira sareon gu lamone...

1. *Europa ke savsaf wideem*
2. *Kosavera va warzafo tawaxo*
3. *Tite biot*
4. *Bravon ice lamone*
5. *Moe vawa ke kazapa*
6. *Roti ke dolekikeem*
7. *Blizepesa widava*
8. *Kolnasik va wevala*
9. *Grot is dreemik*
10. *Ayik keftakoles*
11. *Aelakola voxis durga*
12. *Jora koe vawila*
13. *Yambik zanon gu Lorik*
14. *Grupera walcoson*
15. *Tucpastik : tanealik gu kristeva*
16. *Moo vawa ke Compostela*
17. *Diolopik is tilbuik*
18. *Gazik is sersik is biptik*
19. *Iyepta ke kabarand*
20. *Geja kan imizxa*
21. *Okolgejik koe rand*
22. *Rebava dem erbilok*



Europa ke savsaf wideem

Mila jara pu kottan : vebaltara is centewarolara (banlize centa atrir) is nakwarolara is taplekura va widi-keem ba mila evlacka tixad. Milinde kotlize koe Europa. Widi-keem va mil tilatumtik dikir, bal ezgalday va sint katrasid, ta yega ke sangamb is graltas jiomaik belcon kobad. Blira koe wida tir donafa.

Taway dere tid donaf. Metan tir digis, don dace jiomaik tis vonkik ke jiomasik rodeswas va jiom. Oluik va anton ki ke intaf taway volmiv midud. Va arak pu tawadayik zo isker. Bantan koe Taltefa Europa vaon mantapon dadid. Va savena taya pu konolesik ronodead ise dace rowalzilid. Voxe va tan pak ke warolakseem is warzekseem ke vartera pu lamone ok tucpastaxe gobilded, voxis koayka rododena ika yon dilgavaf talolkany.

Bat tawadayik va taya me rotistayad ise me djumistayad. Widaxo tir donafo, ton dile nokeem kadime vesk. Taya remi tanoya tanda fuxe toloya ok baroya galeteson zo tilder. Memidunon zo tuminjar. Tokinde donaf bonoleem stan gan dodaf bonolsusik co romalestur ede minjaf tayeem co tir vawale istayaxa ? Tawadayik va taway ke jiomaik don dubuxo ok aalxo tciamafu gu wida adre fafiged. Bonol is bulol pakon govitaf is namulol is deaxol moon zo ginyud. Inta is kolt is ilavot kouon zo narid. Remlanisa bruxakirafa ok imkirafa wivga koeon zo tadud. Aala tir glupafa isen tawadayik koon gigelbed kotviele ubzer oken jiomaik va roti rofaved.

Wida va int staper. Brelt is frinca ta layera va vage zo taplekur ; bayna ke namulol kan frust zo femur. Rostela poke mona atrid. Kotviele sinka gracer, pune to aelakola tir.



Koe Europa bota tir riapafa numen kolt tir tciamaf. Warolara tir koe aala : tawadayik va blat lorason tcabaned aze va glemi burmed numaze va kolt kayestad. Varten blatak krulded voxen anton tol-tandean zo gituvlardad.

To jora va centewarolara koe eceyxke ke geeka tir. Xuvatason va cente kan lebat nugeem, centewarolasik va int basvukudad. Tucpastik va centedanya ta mista daditid. Kotlize lidawicka nover, centa zo miduckur, isen kottan ba centewarolara gistuter.




Va idatcol obrapac !! In aname bonoltum mwarner. Voxen delaf sus vakol va flek acagis va demeem ke snovol tiskir isen migexanafa wida pokeon tigr. Namulolsusik gikamius poke milkava koe wico moe dotaxo keniber.



Bulol ton pakon govitaf sok moe dotaf taway aname wida blid. Bak santaneaksat, tawadayik va gama ke persa alied nume va perse karolapane gan bulol akeoyesid. Nope pezay is butcimap, bulol vas wafibol vektad.

Taway tir ke jiomaik isen kobara ke tawadayik. Voxen sin va warolaks pakad. Kabdue bat ujajiomaik, tucpastik va kota olkotca patad, i va ato is ciastoa is olksabe is furutsa dem fest is bludaki, i va kot warzeks rekolon bilden gan widikeem.



Kosavera va warzafo tawaxo

Bak decite ilana, aalafa bira is dubuletaxo va wida ke Europa sostad. Dem midun tawek, sina tid tec bumaf dwag koe tcumivafa tuwava. Voxen ayik moe pinarsafa taya al jonkawed nume va aala djukuwasarnad. Ugal ke aalagabe-sikeem batinde tozuwer. Kot irubasik va belkera is xokaguca ke blira koe wida tabid nume va kuftapa narid aze mallanid. Tucpastaxe is widava is jiomaik va guntasi zubi pu sin ta gridubura is komidura va warzafo tawaxo draged. Sin va jontika sorka isu xeka mbi tiskad ise tori tanoya ok toloya tanda kali taneafa warolara zo bligad, i kali warolara divzaetawatana bas tuwava ika ubzesa askifoara.

Konakbat wasarnasik en tunuyawed. Savsaf « *serf* » levetirik tis copaf aelesik, va dota bas tucpastaxe malseotad, ise va kaxaura va siaxo vas welmotap bas jiomaik, i va siaxo vanpitiso

intafa pilkuca. Va yon gunt meviele pokoleyen gan kon abdigadik batkane urlicked. Voxen jiomaik va belunda wiluon djukazawar ise va ziliduks djulaumasid. Batdume va kuvapafi zubi kaxaad, ilaneon koucomason va erba num iskeson va tegisa nuyuca ke tawadayik.

Mona is vawa is uja zo kolnad, voxis sukarn is olkxe is gard doles va denta. Yon kunoy decemiray zo komidud : aal koe azeka valente Franca is koe Belga is Engla is Germana griawid. Aala koe meftavaxo anton lapter. Widatum kene vawa moolanina gan befoltik van Compostela is valente Espana vanblid. Koe birafa Vlaandera is kene atlantikafa krimta koe Franca, weda zo turodar. Tawa zo lostar ise gu kevbatum zo konendar. Tanealik va ribiega askiyid : va zikexa ke blira dace betayad.





Lavarn mali Savsugal zo gruper ise va abduxoapa kapbure guazafi maglefasiki kaatoer. Voxen glefasik me tir digisik va lavarn. Ban tir digiks ke jiomaik vegeduyus ika oyakap. Mali XII-eafa decemda, sukarn koe tawaday awid.

Widikeem va olkeem zo gonoglefar. Jiomaik va antoka ta glefara batkane dadir ise erur da glefasik va sangap di yuter. Va savsavafa magatcewa volmiv enomar enide kota birgotafa glefara di zo tatcer.



Namulol tir galovaf bonol. Ta bayna femutuna kum lay zo giyar. Inafa atela tire zo estur. Sum zo dimnarir. Veyna va epura va wazdel ta lexisiki zanudad. Akta ke namulolya va donafa bluda warzer.



Matelamiduxo va tawadayikeem gu aelakola fereon giwad. Sin va kunta kulafa gu bray midupud. Baroya colubinda krulded, isen afeda is nyorku is biolma is fleoca is moekote urt burmeten do umta.

Nak tir riaf bak Mialukugal isen dro ke dolistesiki tir tcazafo. Batdume ini trumason zo kiewagir ise kan witruma zo witrumackar. Arbe umo werdxo, viele idulugal tir rodarsaf, pune lo bonol bak santaneaksat zo gobalier. To « forteykiraf aksat » ke tawaday tir.

Gridubusik koe aala va « *cognée* » kuftapa faved, i va kufta gamiafa loon dam kuftacka, dem yantaf enaavap. Gama kan wispa zo solgabed. Kros kan okolafa sorka is roda zo divzaetawad. Mikaci zo firded. Ta ziara zo tucwad.





Tite biot

Ke tawadayik ke Europa, blira taneon tir to laptera is lyumara va ael is fent is akola is rojura kev lonjera ke jiomaik is diltura ke drendik is erbudasayakaf «sistu» ik zugaf idatcol lanis mal ronekafa azekapa.

Voxen digira va taway va widikeem tutakrelar. Kore sin me tid pilkotik, gu sinkas taway zo titickad. Batdume va in ubzeson kevrojod ise va rob is duxara walzilid. Widafa doda va okilik dasugdar ise tod govestafa debala va donaf goraks gotur, i va goraks dosten is rewan gan eem. Widik aname ujugertik lodam jiomaik va sint delad ise va anamsura is suera is tcabanera va idatcol grustad ise va fraskesik is dace diwikya nendad.

Tison ton lebaf nimateem isu nugeem bak idulugal, is diskison va intockeem kum inta bak fentugal, tawadayik va intyone vage kum duskafa bayna miv epud. Remi rotaf cadim va mazdafa lioza kum bayna diskid. Moe taka va gom is eresta kum eyeltstama. Neken ayikya xodiad da va ekoltafa takaxa is gem dem taca bal joraviel diskid. Fentugalon va prantafe vage nendase gu fent mu rumeik gilepud.

Yasa va mona miv vegedur. Norka is romafa mikiya koe ant Geeka zo faved. Arlize kuritca zo turodar, lensada gu intafa siska ta epura va rebava zo aotcer. Tusudayana eluxa va ralpa zanudar. Kepaita tir kum korid. Koe gola lize rapor aultover, rebava tid kum belceyen jolot egupadayan gu tawot. Trek tice kepaita vas keldega gubeon vodar. Meka koafira vaxe teyka ke teyova tir. Kottan ba siel sye senyar.

Wori blira koe wida me tir gabentafa, kiren daavaca lidam puida zo walzilid. Warolara is tumtikafa jora is kurera is koblira ton wiverapa zo kiavad. Milunt dem centeda bam zo fenkid, ayikya va koltafa lupa burmed, isen lexusik va jotikeem kan mam ke siga stutesid.




Intokol vas tsent vektar, bragoda tir kum bapla, gildetcolk gan atelonyik al zo zilid, isen ivamuk tir kum tanoya afobajayana gralka. Batcoba me tatcer da rumeik ke wida vefad. Va ustonda is flicueem dace gruped.



Widik me ronotcabaner. Tcabanera tir jiomaafa tegira. Soe tawadayik va libol dun ikser ise va eaftaf abrikol ko tawaz gidivtunser : otces libol va kona dona atceyena reme ar bexodeem ke tawaz bam kewvulter.

Idatcol tid eaftuca ke wideem. Va jiomaaf aalxopo aelepeson divlanid. Dile ilupon artlanid, kou tulon sumefa Rossia. Tawadayik va sin van dona kabalied aze akricuson aytad. Bata tcabanera tir iyelakirafa.



Azilkara va okol va gorukafa abduxoa kaatoer : nover da sulem lodabrotcion zo faved isen logijafa sugara zo seotar. Glotcasik va krafol is milunt dere ivamur ise va xeka is katecton imizxa iar. Va olkotca ke ziita asketcar ise dimempar.

Aelakola va tarlera ke widik dile askir. Bat tawadayik va sostayan oluaf okolgejik darimon ice kelda iped. Voxen gokalobrad kiren jiomaaf malyerot va tarleyes tawadayik yoltkiraf gu « Jacques » givolkavar numen sinafa exura tcazapon en di zo pursar.





Bravon ice lamone

Sin dum cabiala koe suka dankad. Va awalt is daava kadim abdafa migexa ke lamone vanbured, i ke bat flint ke oluik. To « *mé-nestrel* » ezlusik tid. Jiomaikye gitir figafe is jontikviele siafe. Voxen inafa weltikya va renadanka balte terektar ise va dankasik ok ezlopik djukavedgober ise jupar da jiomaik vangruper da gildera va ksevakiraf blok ke « *troubadour* » ezlusik tickir pibaca.

Weltikya va tipu ke alto is grivutera va listafi tayi pu jiomaik dere tuadrad. Mu sin va sizuntasa kseva narad : va falte tise leca ke saguca, is kuse ok kadule lecase va kaluca ta renara. Kere ok ebelte iskedane gan listikya gan okololuikye zo tiskid. Sina va myotxa (ke werpol ok manyukol ok bruntol) storped maneke sinafe jiomaikye dere toz diskid. Va prate is gem kum tciamaf lay diskid. Weltikya loloon ekoltud. Tapeqa adre vanpir giltira ke kulapik.

Lan erod koe jontike lamone tuyavawer. Tciamafa porma va guazaf ceptayan kold jovler nume va int moe tinida is pormak kabdunedir. Cava ke storn askir da kota oluikya is zanisikyeem vanpir skeus fidesik. Lokulaf jiomaik va balumasik ta zikera va susikxo ke lamone gu kudja va gradilaf okololuik rozed.

Lan selt dem segenik is kubanik koe lamone blir. Okololuikye va yon pomas oluikocye isu ervokirik isu okolxeik isu jiomaaf kaatoesik malyeras is dotas va sang is grastu dikir. Weltikya ke lamone va yona zanisikya dikir ise pu burmotaxoikeem is yona gritikya isu vagesikya dirgar. Kot unenik va warzeks belon bilden gan wida remi ilanacek ulir ise estur. Tod sinkenjuca, lamone va intafa vaneksara miv gavoravalдар. Jiomafa tamava tuke kobara ke widikeem is zilidukseem ke tawa cugtode blir ise remblir.



Ba taneaksat trusik ke lamone pu tawadayik va trura dulapokanon taved : widik va uliks pu sayakik godoled kire va boda kotviele tazdad. Tod olega, jiomaik va tawadayik ko intafa ervolia gimalsaver.



Flawezoc gralomeyen kou begama va tcabanera raver : flawezusik va inaf djimot su deswar. Va in van « fingexa » kabur, i van fingexa kaliapon dustana gan palik. Fingexa tir rolafi zveri ton vigrokaxa. Flawezoc va ina ticutalason goniper.



Sielcek koe lamone tid abrotcif. Jiomaikye is weltikya va « ménestrel » widalexusik voxis dultesik is rupolnedisik lidam dankasik is stutesik puveguson vedgobed. Voxazen fure « trouvère » ezlusik koe lenteka isu « troubadour » koe geeka va logedelafa deasera vanbured.

Va renezla ok jiomaucafa negapa kareizud. Lanbata nega dum « La Chanson de Roland » kali min al artfid. Va vult ke loon balem-decemoy « troubadour » ezlusik ke geeka ke Franca grupet.

Remlakira va za tir ika tcazafo dro ! Doleks zo godoled, ton titickafu grastu ok sang, pu unenik ke jiomaik sus is dile vegeduyus va za. Batlize ziliduks ke zaf sang pu tucpastaxe zo zilir voxen ine va za kevayon gonokiewagir.

Dubiesik is vungik gan jiomaaf malyerot durulon zo pursad. Volgunik kabdunedinon zo dijur, ton taka riojana isu nubeem remi lan jijacek arapenin kare zolonuca ke derka. Ika lodastirbafa gakera, ustara ok peyara zo rewad. Gomilasik sye zo vrayar.





Moe vawa ke kazapa

Ant Roneka va moava is kulaca dadir. Europik djumurlickes va ríaf is tciamaf warzeks ke Sinia ok Barata gu arabik gosuled. Voxen to redusafa is gíafa swava ke italiaf arientik isu dorkesik tadleyer.

Abduxoa ke birafe ckane tiyir gorukafa. Italiik va logíjarotífa tota dun imaxud: rembureson va uíol vas 300 decitor, efrudapa totasa kan ital va Venezia mallapir. Kaikion genovafa totapa va loon 1000 decitor bureyed ise va remburerá va awolba is plom dem punta ok vor is milunt dem wíxa is eyelt dem denta ok eip zanudayad. Ta vegedura va mana yarlapafa tota, akenaf erbamergil tir adraf : ant italiaf dorjesik vaon dadid. Voxe va dolekafa kametca kev tcorídk gorojud.

Moltap va ronekafa kazara ksubed. Ta aryona mordara waleuropafa, dorjesik va dívefa tota (euskadíafa ok portugalafa)

gosimpud, i va tota remburesa va leon decitor. Tegisafa treskasa kazara kan tota vas 1000 decitor ton kametca tir koe nubeem ke birik ke Franca isu Engla isu Breiza isu Marseille...

Italiik va ronekaf warzeks moo tawavafa vawa dívbured. Vawa koo Alp rodega gan dolekafa teremta zo faveper ise va gestura va dolebela ke geefa Germana ik wídava kene Duna bost ok koe ístefa Europa nover.

Koe lentefa Europa, ant Hansa gluyista va italiaf dolekik vwon gu zolonuca rotuelicar. Tuke « kogge » totapa, va lelt is myot ke Rossia is dúalt ke Vlaandera is warzeks ke North Bira isu Balta remburer. Tota dem azekaf ludev va jontik bost ke lentefa is lenttaltefa Europa katiclapid : dírekeugal ke Talteka moo lavok íxam tígir.



Vawa ke leso tir tela lodabrotcafa ke tamava. Teremta va tciamafa lesoxa voxis awolba mal Parsa is Sinia kal krimta ke Mediterranea bira malbured. Banlize ko efruda ke italiaf dolekik zo vajad aze koe Europa gire zo doleted.



Kene vawa ke Europa, dolekik is koyasik koe yorida va mielcek gitiskid liz okol ko okolxepe dere zo vedgobed. Konaktan koe mila mawa isu ilava kenibed. Voxen azekor fereon tid donaf. Yoridik va listafa sugduka fintad. Batlize : *Dene Moavaf Krafol*.



Ko bat divulaf milunt semayan gu trek ta gaelara, astokolstasik va iewaf kabay ke kraytacek vajar. Ko widava is yona vemafa wida pokon vaon fu doler. Ant eipayan ok vikizeyen kabay jontkedje videwer. Voxen eip tir tcazaf bak Mialukugal, batdume dro ke kabay tir pofo.

Va runda pu weltikya iskec !! Koyasa eda ke weltikya va tan tuvel ke widava divlakir. Batakaf okol tis sugda ke oluuca ton ematc zo vansomkayad. Ervokirik moe okol va eda kadimelakid kiren kona koyara me tir musafa. Tawadayik va edava van kril emar.



« *Va filav ok bli !!* » Toloy dolekik gan bat vawapaf drendik su mbi dubied. Anaxa me krulder. Filav dem moavaf talolk is erba bene korik zo rembured. Ant kulaf kazasik va dositara ke ervokiraf fuzodesik kanir.

Eyelt dem denta koe biledava zo ezbayad, i koe bileda dem gamiapaf krafroleem. In tir dem vageje ise va lamonef zanisik diskis va tantazukot is leltaf stazeem lemer. Sokaj ke vaweem is duskuca ke siuviskaf irem askid da koyara tir erodiskafa.





Roti ke dolekikeem

Koe widava ke Europa, dolekik va roti al narid. Va kulaca taneon al vanbeded, solve oluik va kazara me ronovaskiyid. Va taway bas oluik medju-kiewagis dace lusted. Va dota koe widava reduyud aze kostujeyed, wetce miltik keyakseson do jiomaafi roti.

Lizor ta nuyafa dota jontikedje dilizeyer. To koe winkakelu ok widavapa dem loon 100 000 irubasik dum Venezia is Milano is Paris, dolekik jontikote tiyid ; koe dere yon biraf moltap. Tokcoba co tir mordara ke molt ede erbarpuma kotvielon narana gan dorjesik is parlo-esik me co tir ? Nuda is dace dolekafa rebava awid. « Ragu keve vawila » ok fenkura va dolta koe widavapa gan zolonik anton zo rotaskir. Dolekik tid lokulaf wideyik voxisu lotegis. Va levgara ke mwa ke jiomaik vewad.

Ostik, va int kevon djumabdivad. Va gazara ke dili vawale migexeem djumed enide kaza gu lonjera ke jiomaaf papleketik is sayakik di zo nendar. Batdume dolekikeem do yambudikeem va « gluyista » ik gesia tazukar. Numen bata gluyista va abugaca bas jiomaik seotad, i va abugaca kserasa va miv-mistusi roti pu dota.

Batcoba va roti pu dolekikeem tis lokulaf tire isker. Dota dem gogol kaxaayan gan gazik ok sersik koe Italia is Espana az kotafa Europa vanbliyid. Widava tid dem dotagesik is libunik ; va koaykaka yuted, va ervolita ervoad, malyerad. Battan tid gijarotif kulik, i gazik ke bayna ik lelt.

Bat zolonaf dolekik va mona vegedud, va taway ke widava lusted, va dotaf pol stujed nume va ziliduksap remzawad. Va tari dem moraf dolekik gonotis gotuskaf gu intaf gogoleem felid.



Widavama va kazasik is dolta dile gracid voxe gan pisusik is aryon avlemodaf dolekik zo giworad, i va dolesik grubrostas va glastikya firvison va beyark ik moavayafe anambe ik skunderi ik ksevani tayi ik voltcazafa roga.



Lendit kazaxo poke Saint-Denis to uleon tir. Vlaenderaf dolesik va dualt mal Gent va zarvi pu parisaf lustesik firvir. Tcozama tid ksevafa gefna kseayana moe vizatum kum inta. Tujradik ke Paris miv lakir aze ba taneaf viel va kazaxo kumzilir.



Betayera va tal tir italiafa aptaca. Betayesik ke Genova tid vartaf. Va taleem ke Europa gruped, i va tal pulan kare aldo is buok ke tciamafa yanta. Ozodik ta iara va rotaven tal ixam krulded.



Koe Venezia tisa tuvel ke Roneka, « awolba » zo parloed. Ta burmo-tara lidam selaxopa zo malsaved. Culo ke Barata tir tcazapafu, dum dinkero ke Srilanka ok betceleke ke Sinia. Kolveda is luminde tid male Parsa. Bar-decemoya awolbinda krulded !

Selaxopik is bucadolesik tid tec letcasik. Ta egara va intyona bucinda loviele kum awolba, va bulapa anamzokeved. Pu akolesik tcazapon doled ise va fotikik milmus va dalintaf warzezs kabdue dolta jontik-viele seged.

Larde selaropik abicote tid, pune mejes akolesik to den selaxopik lanid. Ropera va wawik tid fliotafa. Ant kulik va galovafa buca yarlapon rovoluster, i va buca rion keskotackafa.



Blizepesa widava

Guazaf migexeem ke widava nope laumara ke warzafa sanelia titsur : korik mal cuga wida jontikote artlanid, aneyas va tufa ik ditsa. Warzafa widava levrotisa koe Vlaandera is lentefa Franca is Xollanda voxis Languedoc is Kataluna is Italia gepoyted.

Koe Paris, koe Provins, koe Milano, rebavega zo tuabrotcad ise tuglupawed. Wawik va brava div anambe gotrasid kiren lizukeduray vaname migexeem tid yarlaf. Wico is omafa monaja aname ropexe koe gasta vanconyawed. Koeon, ontinafa mona dem vwepafu ragu zo vegedud, i mona kum inta. Nudama wale kot monaxof glarn is berlot (« *traboule* » koe Lyon) dzavewed, i xo albano gan «*baynimpasik* » is wipitesik. Kotlize ulidebaxo is zazda is tcoza tigid.

Kulik va monapa kum rapor vegedud, poke jiomaafe lamone ik wevala ik keyelt yarlapon kolnayan ta bravara va dotafa biota.

Banlize lolistafa onya tigid, tela ke lombardif betayesik ok rogopik. Lana amidafa tumtagesia va intaf tumtaf tilik kotvielon jorar : va Eloi tumtik tilaf gu rogopik, az Joseph tumtik tilaf gu rentasik, akz-. Kot viel ke klibura tir jora. Tiglik va kumba iste gardxo kougar. Va alto ke rejdenik dijuson kabdunedir. Korik kou kota revava tcoketeson lanid...

Lavada koe widava tir riafa. Kottan va ematc kal sul kotgazdon gokaklanir enide ko abday di kayestar. Sinkara va widavapa ixam zvaker. Bonolafa milkava jontikote kolanid. 240000 bonol koe Paris tandeon zo aytad, trabe loon tev-decemoy vieleon !

Isen viele fird ve sokir, pune mana radeya ! Intafa mona dum baploik teyed. Grirunkatason va teyka, lava ke kelor zo lirder. Korik ticu migexa grabled oke kev tuvel va sint jontikote otceson selud !






Tari vukir, dotafa inestala su mamlar. Kievesik va azavzare ke okilik ke dolekikeem (*prévôt*) fu belir, i va azavzare gomalaskitine gan widavikeem. Koe Paris dotokilik do dota dem lokulaŕ glastik va widava mistur. Va musuca is kaza is ardial viunsur.



Enintedara kabdu tuvel ke awalkikxo govukir. Mefelkomatason, va dubiesik koon me ronovonkar. Kiren awalkikxo va meropursunuca ravaldar nume koe widavapa vanpid drendikaf vask lize bantan va mielcek aulapon kle di tiskid.

Widava va besanafo dolexo ixam dadid, i va gard. Dolekik kare aptaca va sint valeveon lospad. Iegason gidoleđ, dakteson va dro pu anelik. *Prévôt* okilik va namueem ke gard is vexuca ke aldoeem is sabeem dure betawes kare gola eninter.



Widavaf fengusik va migexeem afizcekon is mielcekon dun anamsud. Geja is dratcera ke drendafa yelipa vebad da dota gotid kalobrasa. Koe rasek vamoe tuvel ke widava, bioga va alomara ok stubera ok fird mamlasir...

Widavik jontikote lanid enide va xonukesisa klibura di tcked. Tiglik mo bil dimelanison ticumar, doimpason va lanzanik motic bilolk abdida ko xesta vaon titosiper. Ant meoluik zo rovrayar ; oluik luxeon zo bastakar.





Kolnasik va wevala

Vegeduropik is kijasik is balumasik is nubedik kobad : Europa ke XIII-eafa decemda gu wevala zo besayar.

Kotcoba koe Île-de-France gola ke Franca moni 1200-e sanda tozuweyer. Taneatomon gamdayan plugalzatum va ontinuk ke brivatam altogir isen gulafa molispa tid dem vakrilef krilot mantaf dum bedom. Bat warzaf martig yoltatan gu « *Gothique* » va tukarayana folixa divrozar, i martig jovles va gamiafa zuvda ke Roman abala. Azen kotafa Europa zo artfir : Villard de Honnecourt koe Magyara kolnar, isen Étienne de Bonneuil koe Sveriga. Tucpastik ke Cluny den lentefa Italia is Espana is Germana kale Ostera turestad. Koe lentefa Europa is Engla, vegeduks kum norka ton *Gothique* martig zo kolnad. Koe Italia, kolnasik va trilna malsaved. Kotlize vegeduropik laoon tukevlad, milaskitison va tel ke Beauvais kolnayas va tamaxo vas balem-san-anuystoye metre ! Germanaf kijasik isu italiaf vanpid feliik ke vegeduropa. Va pradja kan kolnara va gabu bokad, azen dalaf conyeem ke molispa is tamaxo dum totacewa gepoyted. Nubedik va ilbodeckeyena jola vanbured. Sina kan opelapaf mergil dum jenta zo korundad. Aptaf kijasik abicote tid, mon tol-sanoy moe tanoya pradja. Tid ageltucaf vegedusik ise dem kolnas birgeem koe kotafa Europa koyad. Koe xo va nubedik seged. Moe pradja koe « *vistalega* » kum inta kenibed, i koe vegeduks dere zanudas va estuxo is xekaxo is katanaxo. « *Nuyalaf kijasik* » ke bane sare va pomara is tcicera pu sint danud : va birgaf seltom ixam tadled. Darpe bata decemda, vegeadura va wevala dun abduxoar : galza loeke zo tuontinad, vorma loeke zo tutiguad, tuveli lokulon zo ziked. Balumayana nakila va ralbuk ingad, kulaf ralpot va ontinaf *Gothique* dilk ksevad. Yambikeem dokobayar enide wevala di tiyid ano xo ke kristevafa yamba.



Ta vegedura va wevala, raporxo poke pradja zo gotrasid. Sanelia va remburese jaftolye beitar oke gu limara va int miv vansorkar kotviele tujradik diner. Jola gu sugda ke ilbodesik zo tcalad.

Wevala tir ditsaxo. Vielu kon tozekik va « giwas maserk » rune kolna uzar, pune gu onsera zo nendar. Kontan koe « giwaxo » kale 50 m- male wevala zo somesoper.




Ralpot tid teca ksevafa kotavexa isen va zixeeem ke tumtaf neveem pu tcokesik kimbad. Yambik va nakila kev liwayek zovdad, aze kevu bat liwayek va ksevafi trivaki giskitini kan digaf zokevexeem solgabad. Xuta dere tir kum dig.



Balumasik gu « ewavusik » zo yoltad. Bat va kudja va Petrus tumtik tenuker. Ina vakrile resta zo renzatar. Ewavusik ton soli pradja-pradjon lanid, deason va yamba pu nazbeik is dositik. Va grabom sye me sugdad.

Bat tucpastik ke Toscana koe wevala moe kulon balumayana rovava tujder. Meka rova mei starka tid : saneg va tujbora ranyeson tcoker isen marwida va ayikya gu ayikye griuziar. Dile tujbora moe goba dive wevala dilizer.





Grot is dreemik

Eba me tir mu kottan ! Vansara va yambu-dafa exava zo ixatcapar. Feliik ke dreema va telyon dreemik bagaliaf gu porasa feliuca miv kiblاد.

Kota exava tir antoka. Feliik digis va xekeem va erbamergil dere digid nume va ugot a dafa gu kobavera lusted. Va jontik tavembik is kwik lantode uned : batcoba to koe oksifa widava ke Italia ok Vlaandera tir. Voxen loviele onya va toloy ok baroy dreemik iku tavembik uned. Tid ton yasafa ja. Unenikeem dene oga ke feliik blir.

Iasa birga, dene tulon rentasikeem ok kijasikeem, gan bat kotavenik pu ban xanta-xanton zo dead. Belundatason va birgeem, veemik va intafa rotira kan skura va lan grot gonowazder.

Dreema va inda titickar aze va kalskura eninteper. Vukudias retik va baroy vukudeem xuyavayan kou eyeltap dem jontik godimpar. Milostias tavembik va astokolaf milost goskur. Va uga ika intaf oyak luster. Lukastgibesik va tcobas stravok luxeon godikir.

Tire feliik va nazbeik gitugelukad. Batcoba dere tir toda ke atelonyikeem ke Paris dadis va antoka icde atela moe dolexoeem ke kelu. Gazik kev batmana rofavera gomalaskir kiren lan atelonyik me klabud da va nazbeik klaaf gu perda ok anyustda tufeliad ! Voxen feliik va sint zobed isen mecoba rotatcer da va kon abdualanik di seger. Acum jontik dreemik remi blira dun zavzad unenik was va copamafa kuba. Feliik jonalubon loon dam veemik mialukon sye war. Kwik is tavembik luxeon anton zo sinkad ise zo vreadad.



Biasik va tayi koe bletap dem lava ksevayana gu biaza ik aptaf warzeks. Prioxada vey prioxa miduna vagee Franca va lay falton sobiar. Danjada ke danja miduna koe Xollanda tuckerackar. Zolonaf biasik koe Venezia ok Lyon tigid.



Dilgavaf ok moavaf sentejak tid tciamafa roginda jafana gan uja ok tucpastaxe ta videra va niska ke tumtik. Bata senteja en zo atayed ise dile zo kazad, jontikviele rofaveson.



Tujradik va listafa balumayana rastoka mu wevala jafar. Yambudik va olkotceem ton istok is veyada kankum intafa tarida belcer : intafa dreema va favera va cepta is dace kru biur.

Vanpition feliik, dreemik va lan grot gonokalskur. Bat rogopaf dreemik va dilgavaf vim ubzeson sadjar. Dreemaf malyerukik eninteped. Kadimeon irowa ke dreem tigrir. Yotca remi konak aksat lantode rojijar.

Zolonikya ke italiafa widava va baalpese blucte kum riar lay jafad. Vageiasik sabeckeson blucter. Mu lokulaf anelik, me klabur da va tciamaf talgukay asadar, is va dace duzxa bene cumbaks ke gem.





Ayik keftakoles

Balemoy europik fuxe san- nope ebeltafa keftakola awisa isti XIV-eafa decemda muluf-ted. Widava is tawaday gu irubasik ton osafe kalie zo tuvlardad. Va tokcoba selaropik askid ?

Trakud da keftakola tir neki ke avonanuca ke gael ise va foltara ok gelbera mo bria abdivatason pirdad. Clemens VI papik koe berma va int kobuder ise va mogiba volmiv anteyar. Kulik ke Firenze ko meftava ke Apenino rodage yated. Selaropafa kotla va rotok kle me ropebud. Koe Paris ok Montpellier ok Bologna, sinafa tavera dun tir rietovafa. Korik va rupera va kocadiepileropik ok gertik lodam selaropik rozed. Gertik va atayera va Roch tumtik voned, i va tumtik aloyas va keftakola.

Prostewon uja va dikaca ke selaropa kan aptafa atayera gilika : fraskera va lubekakola pu Maur tumtik zo erur, tela va almakola pu Antoine tumtik.

Selatason va gubefa akola, korik va paz krafiad : selasu tapleku is vodiskaf fomek. Tod govestaca, va forteyara sopuna gan lukast-gabesik kevnaled ise va buca dene selaxopik lusted. Ede tid wawaf, pune va ropexe greledad. Jontiktan va defraxo is apkazuxo vankolano pu sfianuik is gaflakolik is lubekakolik ixam nobad. To enja ke tipu va vonewera ke jontika akola tukuvar. Tovol deas va keftakola koe widava grokiskafa viakud. Lava gan lird ok klita fereon tuyicana zo dafur. Basakolawelkaxa tid megrupena. Arbe tipu, nazbesikya nope voldrikafa radekara me remblid isen jontik pintik bal taneafa tanda ke blira awalked. Isen koe ropexe, tariara is volerod is zionuca va dika fala pu akolepesik isked.



Afark ke kralkpregazik va kottan yatesir. Akolik yosan koe « *léproserie* » akolikxe anton rodivlanid ede va intafa tigira murobad. Va uja is sanegaxo biunon vol kolanid. Tod konakakola, gu diwuca jontikviele zo lanzad.

Radekara vanmiae ayikya koe oga voldo selaropik dilizer. Moi koblira pintik poon zo kobanyustar. Me di fenter voxe va bewa me rolizir. Tuaxatason va intafu kizoyu, koe pastawesa ilava zo kovdar.




Talgasolimpasik tir lukastgabesebik ise va anelik me fromer : va belaxa ke ruyat ta komodara va meja biwe firvir. Kan duskafi judikesiki, va kotcoba widlase solimpar. Tuaxatason va kranav ke rumnu, kulik va luminde faver.



Kolavara koe defra mali Savsugal zo ur. Kumaskiks tove lanyona akola zo milmud, i tove tulon sfianu. Akolik va int lebon kolavad. Stropaf gidatilik va sin bak apkazura vedgobed.

Ebeltafa keftakola va yon decitoy irubasik ke Firenze balier. Alto besayano gu dualt bak miel tit mona zo daykad. Ba gazda ko nomulk gan galucik zo kobuded, i gan ayik aretlas va pez enide va tuyican gael me pezidad.





Aelakola voxis durga

Do geja is keftakola, aelakola tir tan baroy daref rotok ke Mialukugal. Konaka tanda dem dik warolaks va sanelia rovotsalad, i va sanelia divuon anton kazawasa va grelerama. Wida is widegama ton fenkunafa skapa tire blid ; isen lok ke europafa sanelia koe tawaday irubar. Kotviele warolara zo rotplekur, pune aelakola fu sokir. Batdume ezgalday zo grustad enide muva co di dur oken tap co diton dur. Remblira vas saz is kelt rupter. Koe widava, debala me tir lokiewafa. Dro ke beg ticfir viele tawaday va lea denta dafur. Dota fereon me kanir numen edavatum dem olk ta kogestura va aelesikeem me rotartlakid.

Koe widava lidam tawaday, azega ke wawik zavzar mazdafa : dem ebeltafa denta vols atela ; bonol pu kulik ke widava zo doled. Ant koepak ok taka ke jaftoloc zavzad. Umta va rostelaabre giwar. Glastik is oluik voxis dace glastedik lokiewon malestud. Bulol koe nudeem ke widava vulted ise gu zail va int tusudad. « *Esturanya* » re tir pak ke gaara va rumeikya. Dene kulik, atelinda tid jontika is amidafa, rostela tiskana gan midusik ton udaxa zo zanoled.

Jontik sulem zo raweyad, i libakol is tovok voxis poegol is werpol. Bak getinerugal, iewafi baki is termil zo sonted. Eipayan megolaf cot tir « *kabay ke wawik* ».

Awolba (dinkero is luminde is kolve-da is kusafo culo) gan kulik albas va pofa sinka zo kaaneyapad. Tire dakela ke awolba va ligundewes burmekx xatcar ! Vor keni bluda tici estu zo ulir.


Voxen bat glastaf azekor me tir rodolunen kapbure durga ok lorot ke jiomaafa kapa lize cugon bar-sanoya amidafa estuxa dile zo zanoled, kum atela is kabay is gedraf govitol dum tulong gelang dem bruxeem. Sareon gu ael-akola is sutuca, azega dere tir leca ke gijarotiuca.



Glastik is oluik sodud, bal moekote aelakolugal viele aelese sane rovd-awalker. Aftafa vurma ok lembieda pu wawik zo anamzilid. Ujaroti vebacker da goni ke kulik tir tcicera va sutik.



Viele kabaydolesik rotaskir, pune va iewaf kabay drager, i va kabay satcon kaaneyan bal getinerugal vas balem-sanoy viel mobenplekun gan ujaroti. Onasik ke kuksa ok uzda va dreema koe Paris dikid isen kabay ke Seine bost jontikote zo doler.



Zazda tir sanegaxo lize ulixa anton zo zanoled. Vor kou milunt ko datoy rontion zo narer. Ta estura, to estuxe tir. Centedacka gitir dem jontika lava. Inafa xanta gitir pokufa.



Bet begonyik zo goplier ! Ebik djufenkus va dolta gan dreema zo gorictar, kare saneliota ke revava is gruperopa ke dreemik. Beg fuxe aldo zo gidoler. Begonyik va feredjayan zom koburen gan anelik dere ronoburmer.

Atela tir tcazafa koe Toscana gola. Irubasik ke Firenze vieleon me vaon estud. Atelonyik tid ke lokulaf kazasik ke widava. Koe Paris, ticeon tigid. Va bonol miv balied, i va loote namulol ok bulul vox leote jaftol.

Bat atelonyik gan tipu me zo tokter. Va namulolye kabdue sirga moe viga su balier. Va ine basalmar aze winon gan lanisik, aulon celkar. Atela fuxe aldo kare duga di zo doler. Koti ki don beti dugamafi di zo malsaver.





Jora koe vawila

Vieleon koncoba koe widava dilizer : kolakira ke kon sersik ok revavafa jora ok *Carnaval* jora ok artlanira ke dultesiktum... Vawila tir disukexa.

Lan sersik dimlakis mal geja ok tumtageja gan widava ke intafa jioma-axo fawokon zo emuder. Vanmadatason va xultvokoda ok grustatason va teixa zikeyena gu imwa ok ziketeson va vawila is moneem is firvitison va baalpesa disukexa, dota lasutukevlad. Dace sersik va jora firvid ise va sane kogestud ise ulidinad. Bak lanyon viel, to vor ticu sul ke Firenze ok Siena ok Dijon kelu ke dacik ke Burgunda traspur.

Ara jora gan widavaf glastik zo grustad : tulon telyona ke veema tisa fawokaf ezgalday dositan gu felbera. Ujaroti va *Carnaval* jora ginder, i va jora askipina gan kottan moi toza ke getinerugal. Ina va dultesa disukexa moe goba ke wevala nover. Dultesikeem ostik dum veema zo grustayar : va « *gazik* » oges va disukexa eruna gan sersik ok widava dikir. Dultes talpey tid amidapaf : danka is ezlura is maaktaca is nakila ke grupeaf sulem.

Alkafa fipta xuton gu yasa dum batugale dilized, voxen vuwik voxis vegungik is nik ta vidiara ok ailkera zo ganed. Batinde fiptara vanpid daavafa jorinda edje korik stuted isen wawik burkon gijon ronovulid ise ronovestud.

Bak folvaf viel ke keftakola ok aelakola, fipta tuorikawed : widavikeem blikar ise va kranavura is dulkotera kalnaler enide muva ok suka aloyasa va welkeem co di artstid. Koe Espana mana donafa dulkotera tugiltawed : ba tumtaf teveaviel, dulkotesik dum Yesus Kristos va gamiafa gamda bured ise moe lebaf epiteem va eda vas tanoy decitor impad. Sollipas dank ke bore-sikya va nudeem tukotrar. Badenyeti tari va krimpa ke widega vanticanir. Irubasikeem ke widava va gulafa disukexa ke gamdakelda paker.



To ovskikafa jora tir ! Tujradik ke ovskikeem, moe astol, va tujradafa takaxa is aboyoviskikaf gom diskir. Tugazayan gu *Carnaval* jora, va widava kabdue dagafa teixa dem efunik ton sulem ok xatcakirik kolakir. Kottan cugeke kotkane golorar ise moi eldef getinerugal

gonestursur ise gonulirsir. Uja kabdue batmana jora itabuder viele tawadayik va tena ke fentugal is daavafa tuwarzawera ke ruxeem kiavad. Koe widavapa, *Carnaval* jora ton drae jontikviele tenuwer.



Dace lomorafa uja va aillexo dadid, i va atayxo lize koblisik ko blet dem kumziliyina lava kolavanon zo ailked. Pintik kaliapon zo ailked kire bal sarenje ant anyustoy pintik fuxe san- va tolda lajukaikfid.

Widava va jora ke intaf tumtaf tilik gu fawokaf ezgalday ilaneon fiptar. Senteja ke tumtik gu uja zo divplekud aze gan widavik zo piriled. Akolik ko vawila zo bured enide va griakolera pu tumtik di erud.



Kolakira ke kon sersik va widava, va fiptapa voltkirafa gu « *jonchée* » nekir. Vawila gu nokoy zo ziked. Glastik va tayi is tciamafa porma moe dilk kabdunedid. Imwa is gralka mo vraday zo vankabud.

Viele rodcekap dur oken zexa dum keftakola ok aelakola dilized, pune tuvumeltatason va zidera ke Kelt, « *custanik* » va aptaf ezgalday grustad. Kulik lidam wawik ton lebafe kulor is sinton ustason, va varafa widava govekoolanid.





Yambik zanon gu Lorik

Koe vawila lidam uja, moe viga lidam goba ke wevala koe Lenteka, alkajora kotlize so-krulder. Uja va jora koswar solve yambik va zikexa tukramad.

Balumasik is vegeduropik is ewavasik is eklusik is sutesik va « folixabula » va grabom me sugdad. Va aliuca ke Lorik yoltiskon kobaved. Tel yunkes va rifa is tciamafa migajeyxa va Bafela kareizud. Tel belces va jotik ton tamiktum va tujbora tucuisad. Ksevafa ewava lingeyena keve ralpot keve rebava ke uja ik seyta va blira ke Yesus Kristos is grekik kareizud, pu sanelia cugviele megrubelisa is megrusutesa.

« Bula » va disukexa dem pedrasa ewava nakilad. Aldoara va gloga ba Bocafa Malyera, is Dimblira ke awalkik zo zirsed. Tec « gel-trackaf » oretlik va saneg deaseped kire lionad oke « oretlud ». Tere ujaroti va batmana zirsera adre drasuyusa va alkafa adala di biur.

Kore lingera is balumara va nakila ke alkafa blira yunked, pune va koswara den vieleafa blira toz aneyad. Koe berma is mona is sanegaxo, bata yamba ko vieleafa zikexa va int adre inked. Ezlopik va intyon grabom luxeon turotuvapad maneke loseltaykirafa widava ke Italia is geefa Franca ik Espana va ezlopafa graba grustad isen sutesik lion dam alkopik tusposapad. Yamba va blira artazukackar.



Kan idatcoltalga yoltkirafa gu « brunissoir », ewavasik va ludev ke lingeks keve migajeyxa kobaver. Va birga ke kseva dure blifa gruper : batake egane kum tukalkayana niska, is faltuke kankum dilgava roataleyena gan tcavo ke begart.



Koe wevala, zopokusik va kitcova bower. Kitcovaf rumeik tid ke alkafa bema gadena gan tujradik. Sugarapa va lexafa tavera zo raplekur. Rumeik va alkafa disukexa zirsena moe goba ke wevala dere paked.

Tokkane kontan va *Biblia* neva oku *Evangil* roraver ede me grubelir ? Balumayana yunkexa is taneakafo kovdaxo va gesta ke rumeik voxis gadik pedrad ise va davafa corara va alkafa izva atoe. Batlize to koblira ke Yesus Kristos.



Italiik va lenopa keve rebava ke uja linged. Va lavakseva kev iewafa storla kum agafa kalka is gemafe bixe rewar. Kijasik va ludev ziketen bak afiz gan lingesik egar. Zavzaton, lingeks keni ludev gotugorawer.

Dene aboyikeem ke sersik koe Germana, koznara ke dankasik va telyona ke okololuik dile ikarundad. Ezlafe elice va renadankasik katanad, i va dankasik rotuvapon muxas va pestaka. Ayikya is ujarotik va batman yambudik bristud.





Grupera walcoson

Dene kristevafa Europa, tavera tir arienta ke gertikeem. Dalaf feliik isu dilaf tid gertik ok adlutik ok tucpastik. Tavembik ko bema lanid milinde ko uja askid, numen ewa ravena tid tela ke mista ik *Evangil* neva. Kulik dadis va loa erba is kanis va lodabrotcifa vayara, ok grutes rumeik platin gan ujaroti ta gertuca, dene reila vayad. Widava is jontik sersik va tavera dere djuvoned nume kseldutuson va kogrupedanik, va reila zabdud. Zolonaf alkaf veem va tufa ke kotla ke Paris askid : inafa aye-wara tir walcosafa. Widava ke konaka patecta aname Mediterranea bira va mila wica gruped : Pisa is Bologna is Salamanca.


Kazafa kuluca is tufa ke widava va rietalizor bristud. Reila koe widava ke patecta ke Balta bira zo fenkud : Uppsala koe Sveriga is København koe Danmarka. Widava kene Rhein bost : Heidelberg is Köln va yon dalaf feliik emuded. Vartaf grupeik koe Oxford koe Engla tigid. Grupera ke arabik koo Montpellier is Barcelona amuzewer.

Widava va reila is vayara doded voxe va arcoba dam alkopa mu vayasik kuranid. Kotlize rokopafa reila isu sela-ropafa zo zabdud. Vayasik va tavera ke feliik ke Yamba kotla gokevterektad lize va rukuzaca ke ovara is listaca ke alka raver, voxaze va int rotuaptar ise va rokara va tavera ok vansava va eba dum selaropik ok aluteik ok palsotik ok sersaf ok gazaf fayik urlicker.

Vayasik va feliik albad nume ta tsunera va roti zobed. Yasted ise va gazaf ardial poon acagid. Va aptafo mwaxo is yon gogol is tuzawodar va lanyona koayka ok sayakafa zaniga al seotad. Batcoba me tatcer da mielon vayasik va volvura koe kotlafa widava mopled nume va kawazdera ke glastik sumpad.



Koe bema ke adlutaxo, ravesik kan intayeldki moe sid suted. Feliik va abica erba isu bliga bas tujradaxo kazawar. Meka neva tir. Koe locopafo adlutaxo, dace feliik me grubelir.



Koe kotlafa reila, filavkirik va vreda is sinka is tavera kazawar. Ikaon, va akolesik ke ropexe goroper ike va tavexo gotucuar. Zanis « saftik » va zveri sinkar, va neva ageltar, va nevaxo tsenter.



Kulaf rumeik atoen gan gadikeem va reila denlanid aze va kotla kaikion vansatad. Gadikeem va vayara doder. Rumeik va ilava koe mawa pakana do palik rokar. Koe widava dene korik ok feliik dere zo rovistaler.



Ardial tove vayasik koe kotla vol rofikur. Batlize dalaf feliik va ardial-okilik is yon pomasik askipejeyes va vayasik dulkotesir : sin ton klaim dem wazdel bene berga gonixedayad.

Bak cadimany tavera ke kotla ke Köln tisa vartafa koe kotafa Europa diveon dilized. Feliik moe rovava debanyer ise va intafa belira va krent bilder aze toz atatcer. Vayasik fereon klaapaf va drageks ke feliik flided aze va inafa tavera den aryona kotla amuzed, lize silukon di

vanpid feliik. Batkane zolonaf ellasaf sutesik dum Aristoteles ok Platon koe kotafa Europa male abica taneafa kotla zo taved. Rietalizor didun tugjawer.





Tucpastik : tanealik ke kristevaf selt

Wipitesik ok gejik, omeltik ok tawadayik, grupeik ok warlik : tucpastik tid tanealik ke warzaf kristevaf selt, ronon ilplatis va kimeem ke kristevaxo. Tucpastik taneon tid olgalicusik. Moe okol, va oluik bal doaliera ta folixa fereon abduelakid. Okololuik ke *Templarii* alkaveem dem kaba koe nuba va volponkik onkad ; tel ke *Deutsche Orden* veem va irowa ko fentunaxo kene Balta bira kougad.

Koe Roneka, felison va kulafa kazafa vawa dum Vawa ke Leso, *Templarii* veemik va gulafa tufa al vanbeded ise al vanpid omeltik ke Europa. Koe koto gazaxo oku sersaxo, va milveemik erbabeitas pu sersik is favlon cenkas va glastik icde talnamueem dadid.

Kuluca ke *Templarii* veem va gojera ke yon sersik kir. Tujdesik ke Cluny is tucpastik ke

ke *Fratrum Minorum* veem va dewitca icde folixa koe widava is tawaday galbud. Wetce felisik va glogeem, tucpastik va kotafa opa ke Talteka dere dadid, larde Veemap va kotla ke Franca is Germana is Italia is Engla is Espana felid. Nevaxo ke Vatikano va mafelaf nubastuteks malsuteyen is yunkeyen gan tucpastik kev migajeyxa wan vider.

Wetce sayakik is galbusik va folixa, is wetce susik va kristevaf alkolk is ageltuca ke tumtaf neveem, tucpastik dere tid wasarnaf gridubusik isen lan veem va gruadafa kobavera ebgad kire va narilt suxad ike va weda turodad ike va aala tipoked. Dure kobaveson, nubedaf ikatucpastik va kuluca ke ujabolk ke Mialukugal voneyed. Ziliduks ke warzon gridubuyun tawayeem titis lokulaf koe Europa.



Bat wipitesik erus va akreye moe italiafo dolexo tir tucpastik ke *Fratrum Minorum* veem. Gu enwawuca va int al siofar ise dun sodegar ise va wawikeem dun tcicer. Va duskaf baynagem tiskir, i va gem lican gu wazdel, ise va refemakiraf averdeem tiskir.



Tucpastik ke Cîteaux eceyxe va vesk aname xidaxe digid, i va vesk yoltkiraf gu « *cellier* » koe centafa gola. Nubedaf ikatucpastik koe jontika zaniga kobad ise va tawa kobaved, va denta faytawad, va centa ilboded ise va vorany ke Burgunda epud.



Ksudas tucpastik noveyed da va krent ke Savsugal grupet. Kan zveribruxa, va guazaf nubasuteks eltayeltayon sagon malsuted ise gu ewavaxa yunked. Bata migajeyxa koe nevaxo ke xida di zo vided. Darpeda witca kastawer, pune tucpastik va wezo ixam tiskid, voxen

bata favera ware tir volgubefa. Tuplaxatason va migajey gaboteyen kou almaza ke namuloloc, ksudasik va nuga ke libakol ok ludzeyen begart favlar. Tuke yadzusi raporki, in va rola rovorelvar.

Okololuik ke *Deutsche Orden* veem moe Slava zolkevafo tawavo ke europafa Roneka va levetiraf boniasik gilinked, i va boniasik gridubus ik lostas ik komidus va baspexo. Dun gonentinted enide va guinera ke ronufe sane tatced.

To miamiel koe tucpastaxe tir ! Biotasik su askir. Biotara va tucpastikeem ta gazdafa tujbora rozer, i va tujbora ke blikera remi baroy bartiv. Tucpastik meviele mielcekon kenibed. Mal kenibexo kal uja mepulvison lanid, koo reak tis kobraxo.





Moo vawa ke Compostela

Befoltik tid koyutasik ke Mialukugal. Sotreyona kuna, dile do kotrafa yasa il oga lanid. Blizesa is daavafa koyara dile wupesid kiren befoltik va intafa tufacka keveon burer numen dubiesik lagimpavantad.

Tokdume kontan befoltur ? Jontikviele radi-mi fuxara : kone gadikye va nazbeik siofar viele va akola divvawar ; kona ayikya abdi-plekur da befoltutur tode Lorik va oc al firvitir ; jontik befoltik va Lorik ok tumtik grewad kire nope kefatakola al moblid. Akolera is geja is copuca va yon kunoy korik mo kelda stasa va tumtaxo ilkabud.

Skerata befoltura dun laumar. Bak 1300, papik va befoltik ko Roma ta tujborara va taneaf tol-san-tevdeaf tumtaf ilanacek van-impar. Tumtageja dere tid teca befoltura van tumtaxo ke Filistina. Voxen tela losanefa koyara koe Talteka wan tir tel van Santiago de Compostela koe Galicia.

Bliketeson va Iacobus tumtik tiyis vrutasik va galova ke Yesus Kristos, kristevik ke Talteka ko Espana jontikote lanid koe lakid. Va savsavafa romafa vawa loviele kenolanid ise va Pirineos moo bonollamasa kelda kaiklanid. Jontik guazik iku akolik lanid enide va gri-akolera pu tumtik di erud voxe moo vawa ko kono luvedaxo govukid. Jontik befoltik koe kuksa xonuked, tison kosaf gu gomilas remburesik wizus ko salt az dubies... Sposaf bokiz (ikwe *kuld ke Iacobus tumtik*) tredun moe krimta ke Asturias gola, va donila gu befoltik az pilkomodaxa zanudar. « *Iacobusik* » ok « *kuldik* » va kuld pluud. Jontikviele dimon, befoltik va kuld vamoe tuvel ke mona volmiv gretcar.

Greeltafa widava va vistalera is vaneksara ravaladad nume nope batyona lamara tukulawed.



Sul mu wiiskik ! Ko Hohenburg ke Odilienberg koe Elsa gola, itokilik lanid, pokoleson va katrasira va witca. Jontika galovafa klita koe kristevafa Europa kruled ise tid befoltaxo vanimpaso va date koriky isu korikya.



Yon kunoy befoltik ko Roma lanid ok lakid, satcon bal yon « tumtaf ilanacek ». Tel taneaf bak 1300 gan Bonifacius VIII papik zo taneaster. Mo naboxa ke Petrus tumtik bliked ise va nuga ke kudja ke grekik kutcad.

Kene vawa ke befolturapa, uja dem glupaf krilot al zo vegeduyud. Befoltik jontikote bak lanyone sare va sint koon kabelcad. Va jandexo koe widava me rotrasid nume moe bapla moe tilmusid kenibed.



Koe befoltaxo, dolesik va namiks va int tukulad. Koe Sainte-Foy ke Conques, va ewava is lorbafa muka doled, voxik adraca ke kotunaf befoltik : filav is oliz kum almaxa ke wocol is recia is anambe is buca ikz-.

Moo vawa ke Santiago de Compostela, kot befoltik badenyar ise blikor moida va roz ke Pirineos su kaiklanir. Va gamda kum inta ton namiks kougar. Bata befoltura remi Mialukugal tir tana losanefa koe Talteka.



Diolopik is tilbuik

Ko teyak tilbuik !! Malyesik ke Inquisitio erkey reduyun gan Innocentius III ta nendara va kristevafa folixa isu vura to batinde mogorad. In va « *Cathare* » virayik isu « *Valdo* » vagee Franca isu « *Tabor* » ke Ceska is ayon virayik valente Italia brazar... Lanban moe venta va sint gikabelcad aze va pira ke Yesus Kristos ked, artan koe krantoza gelbed enide va onkara divvawad, isen artan exud ise va iriga narid ise va irowa vanmadad, i va irowa dem kosuteyen artowas ravlem dum « **Va ant malyera ke Lorik !!** »

Papik is sersik va rujaso po kev sin madad. Tenekatson va *Cathare* virayik, tanoya tumtageja di tir adrafa. Erkey ke Inquisitio kizey jupad da eaftuca koe Espana is Franca is Italia gazar. Germanaf jiomaik va tarleyes tawadayik vajiked.

Koaykara va kristevackafa blira pu irubasikeem ke bumafa wida koe sumef tawaday tir esacapa. Toktan va akolesik selar ? Kabe selaropik, to fraskesik is diwik askid, i va korik tis geltraf selaropik ke Mialukugal ; sin vatapleku is buca mal-saved. Yeldiasik ke aalxopo va rupa ke idatcolik is rostazaf govitol luxeon gruped. Kas kot widaf diwik zo gonanteyar ? Voxen dace sersik va diwuca crakecked. Ilstaksera va kevelik kan diwedara tir zoera. Diolopik nuve ias va moava, va fimafa yazgara va loa goinda isu akidinda grupecked. Zo lanzad ant ede va gijarotiik funed ; neke jontikviele zo nendackad.

Ebeltafa mista is oretlaca is kota diwafa exaksara gan alkaroti zo jizad ise zo ested. Erkey ke tujradik va rotaf kristevik kan lan gertik apton tustinayan rovedimkivar. Bata ksubera vas divaltoara va degruca gu «diginik » niter. Frasketenon, bantan va diliuk do oretlik volunt gokalebgar.





Diolopik zo mafelad voxise zo craked nume nope intafa oretlafa grupera is divulaf tazukoy is mewelidana bitonuca, va ujaroti tuguyad. Kas me espud da va moavafa yanta grupiad ? Gazik dere dwir : kas va gazaxo gu moava laxumolavad ? Batdume diolopik va intyona birgafa

tegira kadim kagrupena eba loviele preyutad. Voxen ede zo kosmad, pune zo anteyad ike wetce diwik zo brazad. Wori sinafa grupera urlickeyena darpe data bagalara noveter da bagalas opeem di abduxoapad.



Bak taelmielcek bat akoles rumeik den glotcasik zo star. Mo kreyta lebon zo rundar numaze mayeson ker da glotcasik kan rukuda va altoki kofiyini gan rote di tazer. In me gruper da taza moi abice deciteametre abdue alma fu vukir !

Koe koto tujradaxo tanoy winugaf dimkivasik krulder. Inaf lag tir aloyara va degrik div alto ke diginik. Bantan tulon tid : soregrik is zimik is itenjik is xadik is vicesik is noglazik is kilandrik. Kot diwaf tubizik zo godimkivar.



Diwikya va mallanira ta oretlafa migafa katanara egar lize oretlik di zo bliker. Koe rekleda va perak is niska is gemu lembier, ta askedara va diolafa uliwa novetesa va uzerara ke pakesik va rotucaf poeem ke kusto.

Yeldiasik va lanyoni rotucafi roti nuve dadid. Bat ayik ebeltakoraf is dure blis koe aala va widik vudesid. Fakon bevulad diwik. Lantode va kovudasa rupa icde aalaf govitol pu rumeik kareizud.





Gazik is sersik is biptik

Gazik ke Franca is tel ke Engla is romaf germanik gindik is kristevaf gazik ke Espana isu Portugala va roti bas ant Lorik dadid. Tugazatason, zo gotubaerdad ise va woz is sona bas nubeem ke zolonik ke ujaroti gokazawad.

Bat ujazolonik rotir me tir papik ; bantan anton tir taneaf tujradik ke Roma. Vielü gazik tir tubaerdayan, pune va rictaga gu vonkikeem tis jiomaikem ke gazaxo koaykar. Batdume logijarotif vonkik va tubaerdara sye tciced. Koe Germana, va sint katanad aze va gindik sollibud. Vonkik (sersik is dacik is biptik) va pak ke gaderopafi roti kaxaayani gan gazik dadid.

Koe Burgunda is Provencia is Napoli is Skota, miltan va redura va tal is yutera va ervolia is malyerara is estera va patectik rokad.

Va gadakiewega konoleson ok kureson ok levrotison rotugijad. Va geja ubzeson torled. Dile tison vonkaf gu konak nafalik, va bata ok bana gejaneya merelmeson ale kiblad.

Koe Europa ke biptikeem ok dacikeem, gaderopafi roti jontiktode me zo kagrupecker. Targuca ke gazik dile me staper. Va malyafa is keskotafa ristula ta yutera va koayka is ervolia koe gazaxo goninker ise daditison va stinaf zanisik va kotla goredur, va aftafa is rorewackana mwa volmiv gosuter. Koe Engla is Franca, gazik va uma bogruca dadid nume va koinkera va mana ristula robokad. Voxen koe lipenafo jiomaaxo ke Germana, koe widava ke Italia, kota gola isu wid va intaf mweem isu prosteweem is rotiindeem dikir. Kristevafa Europa va yoni gaderopafi roti amidapafi nek loviele volnafi bravar.




Gazik ke Franca zo folir da va eepta is almakola grufrasker. Kevaykason va nubeem nek mecrakeson va uzertuca, gazik va ayiky roper. Kalkpregazik voxis dace keftakolesik pu gazik zo atoeð.



Ziliduks ke gazafa koayka ko kuld budeyen gan grupeapaf ludot is sun koe Temple ralma koe Paris zo plekud. Peroy glastik narayan gan gazik tid blodaf gu Jwa. Inaf cek trumon zo frimayar aze mo vertok zo triosur.

Koe jiomafa tamava, vonkik va nafalik brudir. Badenyeson is nuba-sotceson kalir : « Ti rinaf zanisik ». Nafalik froksur aze va semek is jiom krister. Irowa is woz is tawaki va roti ke warzaf jioaik lecad.



Malyerotafe toldoalie dene jiomafa Europa zo doster. Lan jioaik koridan gan tan milveemik gu xonukesise toldoalie va int ralentar. Surtesik tuke nuba ke Lorik sye war. Batdume sotir volgunaf ede zo koridayar, voxise rokayar ede koridayar.

Papik va staksenik vanbures va kuecayana twa bas kot aboyikeem ke Europa emuder. Gazafa kueca dem sebekaf riot tcalayan gu nafalaf darn wazder da staksa abdion me al zo fenkur.



Iyepta ke kabarand

Koe Europa aboyikeem liote dam sersik tid, isen sersik dum sedenik va kapura ik jorura albad. Kotviele tan awalker, pune widava va int gu bataké is dilgava is imwawilundera dualtar...

Gazik va boksarsafe lamone bulud ise va «kodia» koirubar ; koe Paris Saint-Pol kodia az Louvre berma tulistana is tugijana tid. Koe Franca, jiomaaf aboyikeem ke Bourbon is tel ke Orléans ok moekote tel ke dacik ke Burgunda tid ristaf loon dam tel ke gazik. Koe Provencia, Anjou dacikeem va yambik van-impar ise va konaka berma vegedud.

Italia is Germana va jontik sersaf aboyikeem bravad : tel ke Visconti koe Milano, is tel ke Este koe Ferrara, is tel ke Malatesta koe Rimini. Aboyikeem koe Vlaandera ok widava ke Rhein dere tid jebes, voxis tel ke Praha.

Kapa is ingoy jonkawed ; kotcoba tir yonta ta auzara ik sirta ik kabarand. Ezlusik is abozkiraf dultesik voxis stutesik is lexisik va disukexa paked. Zikexa ke vieleafa blira gu bata olegara va tapega va int zaler ; sersik va storn is lingeks jafad ; va tcazafo guto is tcia-mafa porma galped ise va lexisik is yambik ixalapason erbonad.

Dilaf jiomaik figackon wan blid ; va tcabana is geja albad. Dim tawuk ton gradilik zo emuded nume va kapa is kabarand kreme firvid ; mana kaparandinda me tir volgunafa disukexa dum telyona ke aboyikeem, kiren surtenik va okol is drig pu cenesik di gojovler ; isen ede me xonuker, pune di zo paxayer. Cenesik va waks malseotar numaze va kon kabarand kal ar rovobodar. Va erbilok ke nara-nikya bal doaliera pluur.






Bat jiomaikoc gu semek vas oluagejik fure mbi krister. Koe amuda ke lamone mielcekon zimpar. Kristera tir alkafa fipta isen ujaroti askir da titis oluagejik gobenplekur da mu Yesus Kristos lyumatar ise sodegatar ise va axik pomatar.



Moi gildera va mista az tinefkara, titis oluagejik va *Evangil* neva vruzar. Va varzeem is irowa is prosil dem intafa lingeyena sugda mbi bulkar. Tiyason va tazukoy :« *Va semek vas oluajejik pu rin kristé* », povakik gu levak ke dug tazer.

Gradilafe jiomaikye, i olukik cuison emuden den int ba dimlakira mal geja ok tumtageja ton savsavafa prostewa zo sonar ; koe jumega dem idulafa lava kongayana gu imwavioma va int kolavar.



Oluik tcabanerur. Batcoba tir funteranya to geja. Moe okol va govitol ik wocol ik rupol lureskar. Kan dug ok akricu ok wedok dilfur. Tcabane-rokilik azrur. Azra yoltkirafa gu « *oliphant* » kum wula ke fuzol dile zo ilboded.

Jiomaikya lovele antafa remi gracera ke oluagejikeem, va renarijay kiewagid : ezlopik is ezlusik deneon dankad ise lexud. Zikexa ke lamone toz betawer : zo tulesoyutar. « *Agralafa weltikya* » va imwa volmiv talekud ise va preima kiewagid.





Geja kan imizxa

Sersik gejud, numen duskik levgad !

Sareon gu lamone, jiomafa geja dun dud : yasafi skudji is koboda ta yutera va jiomaf sang is jiomikafa gluyista do volnaf sersik... Kore tawadayik me kotviele zo koervoliad, kiren jiomaik va segera va gejebik abduabdad, i va kubayan sayakik, sin va danexeem ke geja levgad : grastu is koayka zo laumasid, bonol ta kogestura va ervolia zo vangir, miduxo va meldxo zo zanudad nume zo kerestiad. Radimi solelara va ervolia, sayakik tudrendawed nume va wida is bumaf diel kene vawa elaked : bata « *rumalapa* » mayesid.

Koe Talteka, geja wal vedey tugovitawer. Du Guesclin jadiwik va pendaropa va « *anteyano tawavo* » kev englik zaler : vilara va kotcoba, i va taya is warolaks is olkxe is eipxe, aelesitison isis poatason da kevelik di dimvilar. Okollakira ke Ebeltaf Sersik koe Aquitaine winkapa va dat rawaks isu awalkik kadimoon iskeyed.

Golafa geja tueuropawed. Paketeson va brinugapa kabudana gan gazik ok sersik, jiomaik va sint jontikote kabelcad. Va mallakira pintoton egad ; bata yarlapafa brinuga va tadlera va totatumpap jontik-viele askoar.

Italiik va geja me albad. Va ebik vajged. Viele italiafa widava va ara koliker, pune va zanira ke kon redakik yoltkiraf gu « *condottiere* » vaniksantur. Bantan va milk ikaon yuter, va bliga is ugol luster. Sayakik tcazon zo kubad. Meld tid grupeaf ise ilamotiskon zo dolantid kiren mil redakik va dro ke detikeem nume cugote lasu-megar. Loviele me elaker kire gan ceneyena widava fure zo rosegeter. Dile zoera ke roti askir da gu « *rotikirik* » gan duxason felina widava zo goflir. Voxe va gejura loviele nemon blidackar.



Oluagejik va jala lyumar : va roleja alubon gotrovgar. Voxe gonobrar ise iston gotazer kire edeme gempik gan rukuda ke roleja debaltena moe lya int di zo tazer. Jala tir lodolgafa funtera tove raves oluagejik.



Tite lamone, jiomaik va « ost » ervolia yuter. Duskik rodedisks va ervo zo kabelcad. Va atsa is kaba is dile ametcgrompa kazawad. Va bata zana vas konak viel pu jiomaik ilaneon danud.



Yolt ke bata tra atcena gan foria tir « baliste ». Tison crakefa kabuxa, kan raporfixuk rotaorar oke kan teyana tilerda va korid rofirder oke va vidunt ok altoxim tuyicas va lavada ke lavak rotikabur. Inafa elimuca tir katcalafa.



Englaf oluagejikeem va geja mo tadava burer : oluagejik va kold is ervo volmiv vajad. Lan remak reme totacewa va kototara va gamiaf okol koyatas vatite yaxa nover. Englik va jontikote torekxa proyon dere divbured.

Vagee Espana, espanaf oluagejik va pemaxo kadbue ralma gina gan arabik al tiendud. Deblamera remi konak aksat dile jijar. Va kona divlakira djuvaneksasa kottode gotatcer. Zolonaf jiomaik va kulon zikayena brocapa dadid.

Koe lodopelafo pemaxo, sayakik koe baplaga ok dace vegeduks kum edgarda dile zo vistaled. Virk va ewava ke Maria Ketya kaatoed : to tumtageja ke « dimolgalicura » jiadatasa bak 1492 nope konarira va Granada tir.





Okolgejik koe rand

Ba imwugal, gazik ok sersik va ervolia kotawukatason yuted. Va okolgejikeem is lanis sayakik is zanisik is gamiaf ugol (*baliste* rodjemasiko azu *bombarde* isu *couleuvrine*) katanad. Yutera va sanelia tir tcazapafa. Koe Franca, ravaldatason va ixalara ke geja, gazik va loaca ke koaykacka benplekur. Sersik pu lombardiaf omeltik dile gonerbabeitud.

Ervolia meviele tid akenafa, dem anton 10000 ik 15000 ayik ; francaf okolgejikeem va 2000 ik 3000 okollakisik bal meldap anton vanconyar. Bat gamiaf doaltiesik wuped kotviele moe okol mea debanyed. Va pertor vas icle bar-sanoye decitgrame diskid ise kan kaba abrotcafa vas balemoye metre ok kufta ok falvoda ok dugap vajiked. Pomasik is zanisik poke jiomaik dun zavzagid.

Trusik is fengusik va tazeso po ke meldconya tadleked. Zobexe ke trapa kum subriginta ke englaf trusik tir vas 250 metre. Tcekaratum me tid keskotaf kev pertor voxen va okol jontikviele artnid. Lanis ervokirik va altev ke okol kan gaskey dildud.

Geja nitecker wana dem deblamera ; ervolia kobudeyena koe ralma zo gonalojar. Kot mergil tir kiewaf : ontinaf tanamus rasek vey Savsugal, is riliza tite rebavega, is *baliste* rodjemasiko kalkabuso va raporfixuk kevtic migexa. Isti XIV-eafa decemda, francafa ervolia isu englafa va kaburervolia toz faved. Lopwertafi buli yoltkirafi gu « *bombarde* » va raporfixuk kabud ; teli lopinafi va digvilt. Batdume geja leleon tuolukawer voxe loloon tuyarlawer. zavzagid.




Ayik va tanamus rasek kevtit rebavega su impad. Bravon ice pezay ke rasek, uspevasik kobaved. Va fe ko rebavega suxad lize gu koteyatana klova djed. Ba atitsura ke rebava, sayakik tandes moe rasek di ruzaded.



Widava zo elaker : sayakik va tuvel ke mona tsaxad ise va irubasik aytad ise va guto kaljoxad ise va rebava dile bralad, kaaneyason va dilgava ke korik. Kotcoba tir nariracka : vage is porma is xeka ikz-

Tra kum subriginta ke englaf trusik tid keskotapafa bal meld. Tcekara va okolgejik zgawes koe gamiaf pertor divkonsibrad. Lubesin okol-lakisik bam tid merotegis : kan nubema zo xonukesid vaxeda di zo ropaxayed.



Ta ruzadera, kelor ke ralma gu baspieks is ye is klova zo adoned. Baliste rodjemasiko va ticak ke rebavega dilfud. Ayik motic bil ticumad, inton rojusun gu prosilap. Ruzadenik va lembieyena punta is jeyen violt kevmimad.

Voda ke ervo tir gijapafa. Kadime bat budaf okolgejik kristen gan jiomaik moe meldxo, mwarnesik va xonukik gu ugol nabad. Va ametcgrompa is nubema is okolwast koe widava di zo kalusted. Metan va bat elakesik rotazavzar.



Sona ke tumtafo
germanafo gindaxo

Rebava dem erbilok

Zawa tir pilkomodasa liwa ke okolgejik ke Mialukugal. Viele ta kabarand va int atoer, pune daktesik va tadlexa ke zawa kare lana vura elimon pimtar : kseva ke welma is prosilaf solzarteks is diskirinda is divefa zikexa ke prosil. Tcalok va lan oluik voxis inyona kiewega pilkomodar ; keve tuvel ke inyone lamone is tciamafa porma is gutoeem is lingeks ok storn jafan pu yambudik dere zo gretcad.

Zawa va yasa vols oluik pimtar. Tir tec beksayan avot anton rogribeksan gan apta-cik. Koca : bitej is awalt is tael ; xeka : kuftha is birekasta ; ruxa : imwa is aal is ilt ; rasek is vegeuropafa vola ; is tere sulem : kra-pol is kraimol is kiiz is perak is kabay. Bata leca do moavafa ik dilgavafa tadlexa ton jebesa kseva va vola ke zawa ponad. Ina gu ie is nyapay is porasa sugdeya jontikviele zo tukotrar.

Taneon mu ant oluafa yasa, zawa pu alkafa doda is widava is winka az tire soka kaikion zo gaad. Lana dreema va tcalok seotad, voxisen dace *troubadour* ezlusik. Erbilok ke widava keve virk is tuvel is sanegaxo jontiklize zo rowid.

Bat ksevakiraf erbilok va vieleafa blira gelinad, bazeckeson koe kota alava ke vavila va lana eba oku uja oku dreema ok dacafa berma ok dota.

Virk ke Saint-Denis



Woz



Malyesa nuba

Gazaroti ke Europa va erbilok dere digid. Woz tir sugdeya ke gazaroti. Koe Engla tir kulon zikeyen. Nafalik gan tujradik ke Canterbury zo sonar ise batviele va in godiskir.

Gazik ke Franca wetce an malyerotik va « *malyesa nuba* » diskir, i va erbilok bazeckes da tir felisik va rokeem. Va kota lazava isu jiz rovosperantar, tiolteson bas jiomaaf erkey oku dace tujradaf. Bak meld, gazik va virk ke Saint-Denis volmiv pluur. Kosayik gazaf gu Engla va kerafa irowa dem moavayaf kraimol. Gindik ke Germana gan sersikeem zo sollibur ise zo sonar. Va sona ke « *Tumtafo Romafo Germanafo Gindaxo* » lueon diskir.



Gazik is jiomaik va tcalokafa zawa bak geja is kabarand is keve lamone pluud. Gazik ke Engla [1] is Percy jiomaik [2] va intaf erbilok dadid, voxis jiomaik ke Coucy [3] ok Montmorency yasa [4].



Widava is galdolk is gola va tcalok fintas va pilkoma pluud : tulong Perugia widava [5] oku Barcelona [6]. Welf grella ke Firenze [7] va tcalok dere digir, dum Tyrol winka [8] oku Navarra [9] ok Uri galdolk [10].




Dace befoltik kan erbilok va int pilkomodad : tulong sposaf kuldkoraf bokiz ke Santiago de Compostela.



Sugdala ke avot ke lauvot rotir lidafa ok ezlopafa. *Trouvère* ezlusik va intafa zawa digid. Pimtara va zawa tir pofa ezlopinda karolapana gan aboyafa weltikya.

Dualtgiyasik is olkglefasik, kota dreema va tcalokafa zawa ikatcur, i va zawa tigisa koe inyon tegiv is tite kudja ke tilaf tumtik.



Kumbakorafa gamda tir leca ke Saint-Sépulcre sayakaf veem xantaf gu Godefroi de Bouillon ok Baudouin ke Vlaandera.



Gamda ke Malta va Saint-Jean de Jérusalem giwas veem vuidan ta nendara va kristevik kev islamevik pilkomodar.



Jontika widava va erbilok narad, i va erbilok kawarzen keve kueca is pilkomodas va intyon valdig.



Koe werdxo ke Ormesson debanyav. Ixakaf, batcé da maneke al abdufí ise va coba al titosipé. « Radimi lepestakafa is lotuwavafa prilara, ~ trakú, ~ va Marthe co robaalpé ise va rubuca ke gadikeem co rojekú, kareizuson va lekeugal ke bata wida. » Agié. Va lazavanya fogí ise trakú da, kaiki kotcoba dilizeyesa, prilara ezepefa gu cinyona dofa guyaca va mempera co joackar. Cwe astirbaca al dilized. Batcoba tire tir ageltafa, voxen vamoion grupeté, kiren Marthe va prilara milon gu jin tuolar. Voxen me sonké nume va sugdalasa ewa fogemané. Va rena pu mesiakriky a fogedakté. Vulkú da Grangier W^{ye} isu W^{ya} va kota jinafa kalira pu nazbeya delvejon al rogilded ; voxen jin, kas nekev sinafa tigira pu ine co rokalí ?

— Marthe va jin me tuvazar, ~ pu int tolkalí. ~ Acum ant inaf gadikeem is jinafe gadikye weyonad da van inafa berga blaganyá aze kutcá.

Suyon ice jin, ar yik va batyon funesik wauner. Trakur :

— Bexe ant do ine me tigí ! Kire mantode dere me co rovekutcá, nume va meka skalera co gí.

Batkane vazik sovurser.

Va impadimak koe Sucy golda fu dimrundanyav. Oye bartivackupu ke kera, koe zazdazekos debanyav. Va cpara ke Grangier W^{ya} golevgá. Sin va jin pluked. Pu nazbeya kimbad da ware tí oldik yovatas va ekul arti tanda. Marthe va kuvimeda djumulir ; dere vaon jafá. Arinton, ulison va kuvimeda co zo griporayar. Gadye mekon gildar. Gilisker da va afenka pu int zanolú. Skotcé kase gu jinafa ralidura co zo krandé. Ine askir, soe ulkeson inde Marthe me diepiler da va kuvimeda ulí kire milinde djumaskí.

Artlapiyison va F-, va Grangier yasa divkiavav. Pu Marthe abdiplekú da ba diref alubeaviel va dotay dem « Le Mot » fela is « Tanoy Cadim koe Kusto » bureté.

— Ware vergumvelt co puves pu aguntanye !

Ine kiper.

— Benje, Marthe ! ~ gadikya woltsoason kalir, lemistenon gan mana dika levgara.

Jinafe gadikye isu berikyeem al argawed, xabe ! Kaluca sotir jintrakafa.

Direvielon, koe olda, me satolé da va jinaf afizcek ke taneaviel pu René gopwadé, beka va kotcoba gikalí. Voxe me djutcizá da zo balgé kire va Marthe birgon me al kutcá. Arcoba va jin evodar : re krupté da René me tir amidafe loon dam arak ke palikeem.

Pestaleson va rena mu Marthe, pune mu René is gadikeem is berikyeem leote dadí.

Pu int kuranison abdiplekú da abdi viel ke cinafa kakevetca va ine me wití. Wori, ba siel ke bareaviel, volkeson, va skaleracka va intafa axuca trasí nume vani sielestura va tela neva is fela di buré. Marthe va wazdera va jinafa rena ton bata braldera fu wir, ~ unt kalí, ~ isen ede va mana rabatera co vewar, pune co rodestegé.

Bak bartivamu, dum oviskik kal inafa mona vulté. Bam, kivason da bak estura fu mazuké, bak sanoya wexa kabdue polku paelpepeson ké. Pokoleyé da sionera ke takra batedje co di vukiyr. Ae volson vanlaumayar. Riwe djuprogotcé, voxen mali konaka wexa male vegungaf dilk ayikya va jin riliton levdisuker, djugrupesa da gelbeson keve bat tuvel va coba askí. Va jin gorar. Mamlé. Va mona kolaní. Pu kwik erú kase Weltikya deneon tigr. Fure, Grangier W^{ya} ko olkobama awir liz su zo kostá.

Vagrablé, dumedede kwik co gogildayar da al Weltikya guceson al erú voxe ae va Weltocikya djuwí. Tukeraweson, djiá da Grangier W^{ya} va jinafa mazukera ba man bartiv skaler, dumedede taneaf bartiv mielon co tir. Kire ba alubeaviel me rolanití, pune va neva is fela pu inafa nazbeikya kle re buré.

— Anye, ~ Grangier W^{ya} kalir, ~ kiren Marthe va rin me co rovedgober. Inaf aguntanik va udorcek al seotar, ba aksatacku abdi inafa trakura. Arinton al artlapir, isen Marthe dene diref ikagadikeem resielon estutur.

Acum mallaní, aze larde tce mea rovowití, pune va Marthe lasumetrakú, voxe nopeon dun trakú.

Wori, lanrielon arti tanoy aksat, grableson div omaze koe Bastille golda, va ine titlanise va are omaze wí. Ine va yona coba ko dolexe ta intafa kurera fu narar. Erú da va jin kal Henri-IV di dositar.

— Ae, ~ kalir, ~ diretandon edje va toleekafa pula nobatal, pune jinafe ikagadikye titir rinaf tavesik va tawavopa.

Natcunon da va vayara mbi pulví, dumedede mekara prilara co tir ke jinafa klaa, eefton dulzé da batcoba co titir nickapafa.

Ine woltsoar. Va inafa gadikya trakú.

Va Henri-IV artlaniv, aze me djubuluson vani batyona fobakasa ewa, gorá da va pulaxo arti tanoy bartiv kaiki tavera va zovdara di kolaní. Tí kalaf da battode Marthe va int me guutcorar ise mekon culimer ise dace gu mana wetara nugrewar, i gu wetara entisa vodiskafa. Tí muntaf da ikaon me drager da ta doltura di godositá, ise va intaf ugal kozilir milinde va intaf zilí.

Koe Luxembourg gerd re tigiv ; lerde bartiv koe bartivela ke Pulodaxe mamlar. Va olda levebgá. Koe ucom va jontika erba galovon dadí, i va erba loote dam kon oldik toldon gibeder kiren dene grevelita tigisa kadime Guignol ke Champs-Élysées va jinaf dotay dem riapafe piutegre arinton al dolé.

Bak prilara Marthe givar da den ikagadikeem fu miafizestur, voxen buivé da do jin di zavzagir. Lerde bartiv do acku mamlar. Marthe vagrabler, me giltise da kontel mu dal int va pula jovler.

Voxe, wison da moe azilrova zavzagí, me lasukimbar da moe starka ke Henri-IV re co godebanyé.

Wan mezekav. Kaluca ape tir mana !Vakol va jumta divgrablur aze va int botcer. Marthe ranyar, dum kontan botces va klokara moi moderama is ton gexata ware kenibesa. Altouson mumar. Batcoba va sintafa gildura larbudajar.

— Bata rova tid olgarsafa, ~ kalir, dumedede djuparar kire ranyer.

Va gem kum gemafo leso diskir, i va gem felayen gan debanyera. Va zovdaks rubian gan derma kev alma vol lagestá.

— Djay, larde ko olda me djulanil, pune ko dolta dosital !! ~ Marthe kalir, taneatomon aflason va jinafa iskedara mu int.

Va ine ko konaka gritadolta dositá, tatceson da ine va xa puvesa va int vols jin jafar ; tulon, taruteson va raltaduka mazukesa va jin nek intafa gelukafa uka.

Kaiki batyona mocenera, gojupá da Marthe den ikagadikeem me di miafizestur. Me trakú da puveguckuson va zavzagira do jin puon rototuxar, nume va koncoba aneyá, i va koncoba jupasa da va jin ta binkabemura fu radimelanir. Va amerikafa zazda djukugruper. Pu aguntanik va mana lapira al vol roveberur. Ostik bantan va zazda somenobar. Va yonta gí. Beka ine awuzanon vewar, wan trakú da tere fu finer. Remi bartivacku, buiveteson va kotcoba al yazgá voxe ten karaké nume den ikagadikeem djukudositá, ton swavasok ke xonukalanzanik pokoles kali bocafa vula da kon xag moe kelda van rejdera lizukonatar. Va vannisa vawa wí voxen mecoba sokir. Voxen laizon, tazeson va ralpa, Marthe va stasik ke diremork kabdue piutexe vukisir.

Kalir :

— Va jin kemel !! Pu ikagadikya fu sumepulví, kalison da koe revava tigí, slikeke iluon num zdarianson.

Arti konaka wexa, gitakeson, va imwadolesik boyoté aze va raltada tantanon nará aze va tsenke volmiv epú. Va puvegura ke Marthe abicote trakú, voxe loote guzeká da resielon ware gorotuxatar viele pu gadikeem va xanta ke raltada gonodiveter. Cinafa djumera va nobara va zovdas cultim, bak taneafa kakevera ; rotuxara ke sumepulvira resielon tolkalitina pu gadikeem, i rotuxara valey tela icde raltada, bata kotcoba tiyid mu jin tarja pibafa loon dam kutcara. Kiren jontikviele mepuveguson kutcayason va konaka sardikya is vulkuyuson da va sina me renayá, pune va kutceem ke Marthe djumansá. Solve mana dofuguca tir megrupena gan jin, batvieli.

Marthe va piutexe divlanir, ayewase, radimi tela taneafa rotuxara. Va mane ke zazda keve Daunou vawila pu stasik golé.

Bro darsaf nobasik, va batakafa femla ke zanivasik vendegar, is va inafa kuca ta botcera va dilgavaf xwey, ik va atedaf ok ezlaf yolt ke ulida. Va kerafa raltada dile senger ise abdiplekur da va lavatrutca icdeon lingeter, i va trutca zilitina pu jin ta namira va bat vielcek. Erú da va afigasuteks va aguntanik nedir. Krupté da in tir listaf. Ixam pestaleson da va jinaf trakuray tuzolonar, tí murkapaf kalison da in tir listapaf, vox vilkiranson numen ine di trakur da dolon

kalickí. Batcoba tce va skaltera ko gloga ke Marthe num ostik jekura va inafa muntuca gomimar.

Voxen bak kielcek, va danda ke inafa koyara gonundev. Aguntanik dem grupena griva gu ine ta kiblara va sintaf gutoeem va int al jovler. Voxen inafa gadikya en djudositayar. Marthe, tere, abdiplekuson va ralidura, al seotar da ant rolapir. Revielon va konako guto ta sinafa mawa gokiblar. Beka pu int al abdiplekú da va meke puve ok mepuve nope kona ewa ke Marthe di nedí, soe moe bedom wan lasulaní, soe aulon kore jinafa gandira mea tir ton armor mil dam tel ke lanira.

Bata vebana dositara va Marthe to goxe cwe tir. Kiren kle gopomá enide va mawa ta int is artan di kiblar ! Voxen va mergil witá, i va mergil ta kiblara va mawa mu Marthe is jin.

Va aguntanik kalion vulkupú eke arti lanisu bartivamu, kontan va jin co evodar ede co kalir da artan koe bata mawa kenibeter.

Aguntanik va Louis-XV martig gikarolar.

Grivaja ke Marthe tir ara ; va niponaf martig lodamon abdualbackar. Kle va bat is ban golyumá. Vefara tir : toktel ke cin lokalion fu tegir ? Ba beta ewa ke Marthe, diepilesen va coba zoesa va ine, va volaca govedasugdá, beka dile me zo puvegá, enide va inafa rinta nuxaadá, kotviele va kono guto mu aro leon funeso va inaf iteem jovlé.

Ine prejar : « In va raltadukafa mawa galpeyer. » Va intafa griva dace mea rovewelidar, nume pu aguntanik vaon yofter. Diepilé da arti abic viel, belcon vaon balgetev.

Wori va bata axaca gildansá. « Ede ine va jin me renar, ~ trakú, ~ tokdume pu jin xaadar ? tokdume va intyona abdualbara wetar, is va telyona ke bat yik ika telyona ke jin ? » Va meka lazava trasí. Tela beta soe co tir da co zolté da Marthe va jin co renar. Neken va voluca lané.

Marthe kalir :

— Icle, va raltadukaf lay pu in isket !!»

— Co isket !!

Bata antafa ewa va jin fu cener. Voxen, « iskera va raltadukaf lay », batcoba co milvodar da va kotcoba jovlé. Pu Marthe kaatoé maneke bata raltadukafa rebava va opelafo guto « cinon kiblano » co emoyad, nume dimefison kevu bilita, pirdá da ine va mawa kum kalka volmiv linger.

To baliaca tir. Afizcekon, Marthe al zo kugdapar eke meexuson zo vanolar. Nemon kalir : « Ae, ovel. »

Oretlik koe alto, ke Raymond Radiguet (3^{-eafa} zixa ; diza titisa koe diref otuk)


Oretlik koe alto : berpot (1923) ke Raymond Radiguet francaf suterotik
Xanto : Le Diable au corps francavon, kalkotavayano gan Laurent Lermigny, 2017.
 Dotay : Kotavaxak dem Suterot.

Robelin banliz : <https://fr.scribd.com/document/358060704/Oretlik-koe-Alto-ke-Raymond-Radiguet>



XVIII-eafa decemda

East Indiaman tota




Titi XVIII-eafa decemda, zultaf vaj va yultxo ke kazasa tota ropiilayana gan xollan-dafu sistu ke Ronefa India isu englafu isu francafu tuko-trayad. Bata tota kazasa va India is Sumefa Roneka ba

mallapira kou Europa gu moavafa fostula zo vajayad, i gu fostula lustetesa va tapegaxa : awolba is yelada is rigelaxa is furota ke Sinia is roga is guto. Bat yulteem va gojera ke tcordik nazbayad : batdume bata tota tiyid ervokirapafa loote dam lyumasa tota ise tod geja zo rosaveyed.



□ Remaf wiks va kazasa tota ke XVIII-eafa decemda : azebeem is irubaxoem.

□ Totekwa kulupon zikeyena ke Prins Willem xollandafa tota.



1 Zokeveks ke gli is cewotekwa is boweroy

2 Lupaxa is ilpega ke geak

3 Wilak

4 Ciska

5 Ilpega ke ciska

6 Fayikafo estuxo

7 Mawapa

8 Ilpega

9 Ilpega dem rumkanafa unja

10 Nikoy

11 Ilpega dem mosk

12 Vadimefa dulja

13 Buli vas 18

14 Vistalexo ke walazeza

15 Vistalexo ke titeazeza


16 Bligaxo, blotxo

17 Kevruzadesa dicima


ta

1650 - 1850

Va tezama elimon tuewavasa va kazasa tota ke Sistu ke Ronekafu Sistu koe tcilaxe romafelat. Icde gubef yulteem is vaj leote grupeyet kali kosmara bak ironokafa barsanda va konaka saga, i va tulon tela ke *Witte Leeuw* xollandafa tota belxayasa bak 1613 grocelon ice Saint-Helena ewala, is va *Slot ter Hooge* tota belxayasa bak 1724 poka Madeira ewaleem koe Atlantika welfa. *Witte Leeuw* mal India dem yulteem dem 1311 duzxa is awolba is rigelaxa dimlapiyir. Arti tanoya decemda, *Slot ter Hooge* tota artlapisa va Xollanda vas dilgavafa fostula vas baroy decitor is balemoy kuld kotraf gu dilgavaf talolk dogiskiyir.




□ Liwot ke XVII-eafa decemda bazeckes va birafa vansara va « Warzafa Xollanda » titisa New York.



□ Kudjot kaatoes va siniaf buresik va yelada.

Gazarugal ke bata totinda kalimoni 1850 jijayar vielu gantatota ke yasegafu sistu nijuyud loon kaliafa isu rabudafa.



- 18 Likay
- 19 Likay faven ton namuloixo
- 20 Ikaplekusa viza

- 21 Bonolxo
- 22 Grikseyani buli
- 23 Laloyak, azekos ta bralara

- 24 Intanyofaxo
- 25 Emaxo ke grigokilik
- 26 Vabduefa dulja
- 27 Duljafa azeba

- 28 Ewalzasa tarida
- 29 Kaikiak
- 30 Ekastak ke roda

TELIZ

2^e bu : Blira saneon gu lamone

48^e bu : Oretlik koe alto, berpot

52^e bu : East Indiaman tota

54^e bu : Kuda ke Aisopos

Kotavusa virda

Virda kotavon sanelayana, nuyon is faston romalvajana is rorubiana is rotanamzilina. Ickriluyun rokeem. PAG / DE.

Internetxo : www.europalingua.eu/KotavusaVirda

Bu : www.europalingua.eu/KotavusaVirda/13-e_otuk_11-2023

Sanegara : Santaneaksat ke 2023. 13^e otuk.

Yunkexa is ewava : ewaveem abugaf gu roka ok nuyon rotamuzen ok rictayan gan digisik.

LIWOMBURA

Tula va liwa ke lana ombaliwa watson gu alto. Konaka gokosmana peryasafa ombaliwa.

Xantaza :

<https://kotava1837481.wordpress.com/2018/08/26/7-familles-en-kotava/>

5

Loma
WERDDUNOL

SULEM

FR
antilope

Putcol



Werdtoraf moukdunol dem tiguaf inieem is abrotcaf livaf noleem, soblis koe rijust ke Afrika is Asia iku meila oku letaxo sedme katca. Lana putcolinda vas 100 km-/b-gruvulted ise vas ticon 4 m- grugrabled.

fuzol - jaftol - wegidol - okol - putcol - namulol

Cigavol is wilye

Cigavol, ebiduyus va wilye, va ovacka ta vumbera djutrasir. Acum buntur da ine mielon dankason is weyonason va kenibera va korieem mazuker. Wilye kalison da ta tufavlawera maninde sokaskir, va int pour ; lecen divmodason sokaskir da sin va gubefa kobara setiked. Bam cigavol va ar famint dakter, buntuson da ine ilagison va gadikya is berikyeem va tuwava situndar. Dulzer da ton dere batcoba va dulap ke feliik sokoazanir larde tukeon wilya atoapad. « Kle ! ~ cigavol divier, ~ kore venganyal nume vengarsal, jin tukeon me fu getiné ! » nume va ine vumber. »

Bata kuda nedir da djukurotus tuwavajik, viele va int gu xatcaxanya me robesar, pune nisanon sorotur.

Kuda ke Aisopos, -VI^{ea}fa decemda (kalkotavaks gan Yurani Andergan)